

# Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: [kontak@nuwelied.info](mailto:kontak@nuwelied.info)  
Webwerf: <http://www.nuwelied.info>

*Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het – die Torah van Melgisédek. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die Torah van YHVH net die dooie letter van die wet wees!!*  
***Yeshua is die hart van die Vader!***

## **Parashah 16: B'shalach ( בשלח ) – Om te laat gaan.**

*Dit het gebeur dat toe Farao die volk laat gaan het, God hulle nie deur die land van die P'lishtim gelei het nie, alhoewel dit nader was, want God het gesê: "Sodat die volk, as hulle oorlog sien, nie dalk hulle gedagtes verander en teruggaan na Egipte toe nie." Ex. 13:17 – PWL<sup>1</sup>*

**Torah:** Exodus 13:17 tot 17:16.

**Haftorah:** Rigters 4:4 tot 5:31.

**Nuwe Verbond:** Rom. 9:15 tot 23; Hand. 7:36; 1 Kor. 10:1 tot 13; Heb. 11:29; Open. 15:1 tot 4; Joh. 6:25 tot 58; Open. 2:17.

Hierdie notas is aanvullend tot die vorige notas vir parashah 16 wat afgelaai kan word by: [Parashah16Notas14](#); [Parashah16Notas15](#) of by [Parashah16Notas16](#).

*Today's church is primarily interested in social justice, not the gospel – Jan Markell.*

*If you look up into His face and say, "Yes, Lord, whatever it costs," at that moment He'll flood your Life with His presence and power – Alan Redpath*

*Nine-tenths of the difficulties are overcome when our hearts are ready to do the Lord's will, whatever it may be. When one is truly in this state, it is usually but a little way to the knowledge of what His will is – George Mueller.*

*Love is not just a sentiment. Love is a great controlling passion and it always expresses itself in terms of obedience – Martyn Lloyd-Jones.*

<sup>1</sup>Alle teksverwysings is geneem uit PWL (Pad van Waarheid tot die Lewe) Vertaling ([www.padwlewe.ch](http://www.padwlewe.ch)), behalwe waar anders vermeld. Om 'n kopie van die Bybel te bekom kan Gerrie Coetzee per e-pos by [padwlewe@yahoo.com](mailto:padwlewe@yahoo.com) of telefonies by 074 361 2134 gekontak word.

*Follow Him as well for the bitter cup of His passion as for the loaves – Jeremy Taylor.*

## Torah Bespreking

### Hersiening

Die hoogtepunt van verlede week se Torahskriflesing was die instelling van Pesag en die opdrag van YHVH was om hierdie instelling jaarliks op gepaste wyse op die spesifieke bepaalde tyd te gedenk.

*Dit sal vir jou as 'n teken wees op jou hand en as 'n herinnering tussen jou oë sodat die wet van יהוה in jou mond mag wees, want deur 'n sterk hand het יהוה jou uit Mitzrayim uitgelei; daarom moet jy hierdie instelling hou op die spesifieke bepaalde tyd, van jaar tot jaar. Exo. 13:9 en 10.*

Pesag is 'n herinnering dat YHVH vir Israel, en die menigte wat by hulle aangesluit het, met 'n sterk hand uit Egipte uitgelei het.

Ons het ook gesien dat Pesag 'n sinnebeeld is van wedergeboorte. Soos wedergeboorte 'n nuwe begin is, so was Pesag vir Israel 'n nuwe begin. Daarom behoort elkeen se wedergeboorte ook 'n jaarlikse herinnering te wees van YHVH se sterk hand, wat deur Yeshua se folterdood en opstanding, bevryding van die slawejuk van sonde gebring het! Ons is geneig om te vergeet van YHVH se sterk hand wat wedergeboorte vir elkeen wat in Yeshua as Messias vertrou moontlik gemaak het!

Ons wedergeboorte is belangriker as ons fisiese geboorte! Met ons fisiese geboorte het ons niks mee te doen gehad nie, maar met ons wedergeboorte het ons genadiglik die wysheid gehad om te kies om deur vertrou in Yeshua as die Lam van God wedergebore te word. Dit verdien eerder gelukwensing en die seënwense dat die res van ons wedergebore lewe in gehoorsaamheid aan YHVH se Torah soos dit in Yeshua vervul is, sal wees! Een dag van wedergeboorte en Torah-gehoorsaamheid is beter as 80 jaar ongered en van Torahloosheid!

In hierdie week se Torahskriflesing het Israel 'die pad gevat' na die Beloofde Land! Die hoogtepunt van hierdie week se studie is die deurtog deur die Rooisee wat ook 'n sinnbeeld van die waterdoop deur onderdompeling is.

### Bepeins of Bespreek

1. 'n Debat wat dikwels gevoer word, is of ons verjaarsdae behoort te gedenk. Meer inligting hieroor kan afgelaai word deur op die volgende skakel te klik: [Should We Celebrate Birthdays?](#) – 'n artikel deur Mahdokt Walter.

### Gedoop in die Rooisee

*Die kinders van Yisra'el het op droë grond deur die see getrek. Die waters was vir hulle 'n muur aan hul regter- en aan hul linkerkant. Ex. 14:22.*

In 1 Kor. 10:1 en 2 vergelyk Paulus Israel se deurtog deur die Rooisee met die doop in water wanneer hy skryf: *en almal in Moses gedoop is in die wolk en in die see.* Dit is belangrik om te onthou dat Israel op die eerste dag van die fees van Ongesuurde Brood Egipte verlaat het. Israel het dus by die Rooisee tydens hierdie sewedag-fees aangekom. Die fees van

Ongesuurde Brood is 'n sinnebeeld van heiligmaking, naamlik die verwydering van sonde (suurdeeg, die oortreding van Torah – 1 Joh. 3:4) uit ons lewens.

Met Pesag gedenk ons dit wat YHVH ons Vader in Yeshua Messias vir ons gedoen het, naamlik ons bevryding van die slawejuk van sonde. Ons gedenk ons sondevergifnis deur geloof (vertroue) in die geslagde Lam van YHVH wat ons sondeskuld (die skuldbrief – kol. 2:14) uitgedelg het. Die Fees van Ongesuurde Brood, wat die dag na die Pesag begin en vir sewe dae duur, is die logiese uitvloei van die Pesag, naamlik 'n tydperk van selfondersoek om van die heerskappy van alle sonde bevry te word.

Daarom is Pesag tot en met die deurtog deur die Rooisee 'n sinnebeeld van die eerste stappe en die eerste drie Feestye (*Moe'dim*) van YHVH se reddingsplan deur Yeshua, naamlik:

- ❖ Wedergeboorte (vertroue in Yeshua as YHVH se Pesaglam en bekering, naamlik terugkeer tot Torah soos dit in Yeshua vervul is. Pesag simboliseer die uittog uit die wêreld van sonde wat van ons slawe gemaak het. Meer inligting oor die doel en betekenis van Pesag kan afgelaai word by: [Les 2: Pesag](#)
- ❖ Afgesonderd vir YHVH (Heiligmaking – aflegging en verwydering van sonde) soos deur die Fees van Ongesuurde Brode (*Hag HaMatzot*) simboliseer word en wat die lewenswandel as geregverdigde uitbeeld. Meer inligting oor die doel en betekenis van hierdie fees kan afgelaai word by: [Les 3: Ongesuurde Brood](#)
- ❖ Waterdoop deur onderdompeling as getuienis van die sterwe van die sondige mens en die begin van 'n nuwe mens in Yeshua. Die eerste vrugte wat by ware bekering pas en soos deur die Fees van Eerstelinge uitgebeeld word en wat gevolg word deur goeie werke wat by bekering pas! Meer inligting oor die doel en betekenis van hierdie fees kan afgelaai word by: [Les 4: Eerstelingsgerf](#)

## **Deborah, die heuning en angel van YHVH**

(Hersiening van vorige notas)

Die Haftorah bespreking van dié week is Rigters (Hebreeus: *Shoftim*) 4:4 tot 5:31. 'n Rigter kan beskou word as 'n regeringshoof of opperhoof.

Die boek van Rigters het 'n tweeledige doel: Eerstens herinner dit ons dat YHVH 'n God van oordeel is wat nie sal huiwer om die individu en volk wat afwyk van Sy voorgeskrewe weë te straf nie. Maar tweedens is dit 'n herinnering dat YHVH 'n God van onverdiende guns (genade) is wat sal vergewe en verhoudings sal herstel wanneer ware berou getoon word. Dit word soos volg opgesom in Rigters 2:14 tot 19:

*14 Die woede van יהוה het gebrand teen Yisra'el en Hy het hulle oorgegee in die hand van plundersaars wat hulle beroof het en Hy het hulle verkoop in die hand van hulle vyande rondom sodat hulle nie langer kon standhou voor hulle vyande nie. 15 Waarheen hulle ook al gaan, was die hand van יהוה teen hulle ten kwade, soos יהוה gesê het en soos יהוה vir hulle gesweer het sodat hulle erg benoud was. 16 Toe het יהוה rigters opgewek wat hulle bevry het uit die hande van hulle wat hulle geplunder het. 17 Tog het hulle nie na hulle rigters geluister nie, want hulle het agter ander gode aan gehoereer en hulleself voor hulle neergebuig. Hulle het gou van die pad wat hulle vaders, in gehoorsaamheid aan die opdragte van יהוה, geloop het, afgedraai; hulle het nie gedoen soos hulle nie. 18 Wanneer יהוה vir hulle rigters opwek, was יהוה saam met die rigter en het Hy hulle bevry uit die hand van hul vyande al die dae van die rigter, want יהוה was beweeg tot omgee deur hulle gekerm oor*

*hulle onderdrukkers en hulle teisteraars, 19 maar dit het gebeur dat wanneer die rigter sterf, hulle terugdraai en nog meer korrup optree as hulle vaders, deur agter ander gode aan te loop, om hulle te dien en voor hulle neer te buig; hulle het nie hulle gebruike of hulle hardnekkige maniere laat vaar nie.*

En dit is die ooreenkoms tussen hierdie week se Torah- en die Haftorahskriflesing, naamlik dat beide handel oor Israel wat onderduk word deur 'n vreemde en genadelose koning en in beide gevalle stuur YHVH 'n verlosser en profeet wat Israel op 'n bonatuurlike wyse van onderdrukking bevry. Moses was opperhoof (regeringshoof en 'koning'), asook profeet. Deborah (D'vorah) was 'n Rigter – die eerste vroueregringshoof van Israel – en 'n profetes.

Beide die Torah- en Haftorahskriflesing het die sing van 'n loflied van bevryding deur die hand van YHVH tot gevolg. Miriam was ook 'n profetes wat deur sang en musiek YHVH geprys het vir die oorwinning oor Egipte.

*Miryam, die profetes, die suster van Aharon, het 'n tamboeryn in haar hand gevat en al die vroue het agter haar uitgegaan, met tamboeryne en danse. Miryam het hulle geantwoord: "Sing tot eer van יהוה, want Hy is hoog verhewe. Hy het die perd met sy ruiter in die see gegooi." Exo. 15:20 en 21.*

Die geskiedenis van Israel sedert hulle bevryding van die Egiptiese slawejuk en na die dae van Josua was een van loop en val – gehoorsaamheid en ongehoorsaamheid. Daar was tye wanneer Israel in gehoorsaamheid aan Torah in oorwinning geloop het en die seëninge van YHVH ontvang het. Maar dit is dan weer opgevolg deur tye waar Israel weens Torah-ongehoorsaamheid in die hande van die vyand geval het en onderdruk was.

Hierdie week se Haftorah is een van daardie kere waar YHVH toelaat dat Sy volk, weens hulle hardnekkige ongehoorsaamheid aan Torah, deur die ysterhand van Jabin (Yavin), die koning van Kanaän, regeer word.

*<sup>1</sup>Toe het die seuns van Yisra'el weer boos gedoen in die oë van יהוה nadat Ehud dood is <sup>2</sup>en יהוה het hulle verkoop in die hand van Yavin, die koning van Kena'an, wat in Hatzor regeer het en die bevelvoerder van sy leërmag was Sisra, wat in Haroshet-HaGoyim gebly het. <sup>3</sup>Die seuns van Yisra'el het na יהוה uitgeroep, want hy het nege honderd ysterwaens gehad en die kinders van Yisra'el twintig jaar lank onderdruk. Rigters 4:1 tot 3.*

Na sowat 20 jaar het Israel tot berou gekom en tot YHVH geroep wat hulle smekinge verhoor het deur Deborah, die profetes en rigter, te stuur om hulle te verlos. Soos ons weet: Geskiedenis word herhaal en geskiedenis is profesie. Die einde word deur die begin bekend gemaak!

Debora het Barak, die seun van Abinoam (Avino'am) uit Kedesh in Naftali laat kom en aan hom gesê:

*..... "Let op, יהוה, die God van Yisra'el, het beveel: "Gaan en marsjeer na die berg Tavor en vat tien duisend man van die seuns van Naftali en van die seuns van Z'vulun saam met jou. Ek sal dat Sisra, die bevelvoerder van Yavin se leërmag, met sy strydwaens en sy menigte na jou toe uittrek by die Kishonrivier en Ek sal hom in jou hand gee". Rigters 4:6 en 7.*

Maar Barak het 'n vereiste gestel, naamlik dat Debora saam moes gaan!

*Toe sê Barak vir haar: "As u saam met my sal gaan, sal ek gaan, maar as u nie saam met my gaan nie, sal ek nie gaan nie." Sy het gesê: "Ek sal sekerlik saam met jou gaan; daarom sal die eer nie joune wees op die reis wat jy op die punt staan om op te gaan nie, want יהוה sal*

*Sisra in die hand van 'n vrou verkoop.*” Toe staan D'vorah op en gaan saam met Barak na Kedesh. Rigters 4:8 en 9.

Deborah het nie gehuiwer om saam na die oorlogsfront te gaan nie! Barak het nie gevrees om te doen wat Deborah deur die Gees aan hom gesê het nie. Nee, Barak wou hê dat Deborah moes saam gaan, want sy het as profetes die stem van YHVH gehoor en dit sou hom help om sy aanvalplan en tydsberekening volgens die wil van YHVH uit te voer. Daarom lees ons in Rigters 4:14 en 15:

*14 D'vorah het vir Barak gesê: “Staan op, want hierdie is die dag waarop יהוה Sisra in jou hand gegee het; let op, יהוה het voor jou uitgegaan.” Barak het afgegaan vanaf die berg Tavor met tien duisend man wat hom volg. 15 יהוה het Sisra met al sy waens en sy hele leër met die skerpte van die swaard uitmekaar gejaag voor Barak en Sisra het van sy wa afgeklim en te voet gevlug.*

Barak het erkenning gegee aan Deborah se roeping (bediening) as Rigter en profetes en hy het geweet dat *wanneer יהוה vir hulle rigters opwek, was יהוה saam met die rigter en het Hy hulle bevry uit die hand van hul vyande al die dae van die rigter* (Rigters 2:18). Dit herinner ons aan Paulus se woorde in 1 Kor. 7:17 tot 24:

*17 Elkeen moet leef met dit wat יהוה hom gegee het, net soos elkeen was toe God hom geroep het en so beveel ek in al die gemeentes. 18 Was iemand besny toe hy geroep is, moet hy nie terugkeer na onbesnedenheid nie. Was iemand onbesny toe hy geroep is, moet hy hom nie laat besny nie. 19 Die besnydenis is niks en die onbesnedenheid is niks, maar die uitvoer van die opdragte van God, is wat tel. 20 Laat elkeen in dié roeping bly waarin hy geroep is. 21 Is jy as slaaf geroep, moenie dat dit jou pla nie, maar as jy vryheid kan verkry, kies self om te dien, 22 want die slaaf wat in ons Meester geroep is, is 'n vrygemaakte van God; net so is ook hy wat as vryman geroep is, 'n slaaf van Die Gesalfde Een. 23 Julle is met 'n prys gekoop; moenie slawe van mense wees nie. 24 Laat elkeen, broers, in dít waarin hy geroep is, bly voor God.*

Daarom moet ons mekaar die erkenning, die ondersteuning en die ruimte gee om dit te wees waarvoor God elkeen geroep het! Ons is die liggaam van ons Meester Yeshua, Sy gemeente, en elke liggaamsdeel het 'n skeppingsdoel. Paulus verduidelik dit soos volg in 1 Kor. 12:12 tot 21.

*12 want net soos die liggaam een is en baie ledemate het, maar al die dele van die liggaam, al is hulle baie, een liggaam is; so ook met Die Gesalfde Een, 13 want ons is ook almal deur een Gees gedoop tot een liggaam, of ons Jode of Arameërs, slawe of vrymanne is en ons is almal van een Gees gegee om te drink, 14 want ook die liggaam is nie een ledemaat nie, maar baie. 15 As die voet sou sê: ‘Omdat ek nie die hand is nie, is ek nie deel van die liggaam nie’, is hy daarom nie deel van die liggaam nie? 16 As die oor sou sê: ‘Omdat ek nie die oog is nie, is ek nie deel van die liggaam nie’, is hy daarom nie deel van die liggaam nie? 17 As die hele liggaam 'n oog was, waar sou die gehoor wees? As alles gehoor was, waar sou die reuk wees? 18 Nou het God egter elkeen van die ledemate in die liggaam gesit, net soos Hy wil. 19 As almal een ledemaat was, waar sou die liggaam wees? 20 Nou is daar egter baie ledemate, maar net een liggaam. 21 Die oog kan nie vir die hand sê: ‘Ek het jou nie nodig nie;’ of ook die kop vir die voete: ‘Ek het julle nie nodig nie;’*

Dan herinner Paulus ons ook daaraan dat dit juis die dele van die liggaam is wat die swakste lyk, wat noodsaaklik is, want God het die liggaam saamgestel en aan die ledemaat wat klein is oorvloediger waarde gegee, sodat daar geen verdeeldheid in die liggaam mag wees nie, maar dat die lede gelyke sorg vir mekaar mag dra (1 Kor. 12:22 tot 25).

Wat Paulus vir ons sê, is dat ons liefde en eerbied vir mekaar sodanig moet wees dat as een ledemaat ly, sal almal die pyn deel en as een ledemaat hom verheug, verheug al die ledemate hulle saam (1 Kor. 12:26).

Ons is die liggaam van Die Gesalfde Een en elke ledemaat het sy / haar plek en rol in die Raadsplan van Vader-God. Daarom skryf Paulus:

*28 God het in Sy gemeente geplaas: eerstens afgevaardigdes, na hulle profete, na hulle leermeesters, na hulle werkers van wonderwerke, na hulle gawes van gesondmaking, helpers, leiers en verskillende tale. 29 Is almal van hulle afgevaardigdes? Is almal van hulle profete? Is almal van hulle leermeesters? Is almal van hulle werkers van wonderwerke? 30 Het almal van hulle die gawes van gesondmaking? Praat almal van hulle in tale? Vertaal almal van hulle?*

### **Deborah, die heuning en angel van YHVH**

Die naam *Debora* beteken *by* en is verwysend na die instink (sensitief vir die stem van die Afgesonderde Gees) en die hardwerkendheid (toegewydheid) van 'n by. In Debora se geval was sy soos 'n heuningby vir familie en vriende, maar soos 'n steekby vir die vyand. Debora was die vrou van Lappidot wie se naam *fakkelt, vlam en ligdraer* beteken.

Hierdie geskiedenis leer ons die belangrike rol van vroue in YHVH se meesterplan van versoening en herstel van Sy volk. YHVH sal nie huiwer om 'n vrou te gebruik nie!! Daar waar geen man as leier gevind word nie, sal YHVH 'n vrou gebruik!

*Leierskap het opgehou, dit het opgehou in Yisra'el totdat ek, D'vorah, opgestaan het; totdat ek, 'n moeder in Yisra'el, opgestaan het. (Rigters 5:7)*

Daarom moet ons nie nalaat om ook die rol van Jael, die vrou van Heber, te noem nie. Sy was nie so 'n openbare figuur soos Debora nie, maar sy het die 'finale nekslag' in die bevryding van Israel toegedien deur Sisera, die aanvoerder van die Kanaänitiese weermag van koning Jabin, dood te maak.

*17 Sisra het te voet gevlug na die tent van Ya'el, die vrou van Heber, die Keiniet, want daar was vrede tussen Yavin, die koning van Hatzor en die huis van Heber, die Keiniet. 18 Ya'el het uitgegaan om Sisra te ontmoet en vir hom gesê: "Draai af, my meester, draai af na my toe! Moenie bang wees nie!" Hy het na haar toe afgedraai, na haar tent en sy het hom met 'n kombes bedek. 19 Hy het vir haar gesê: "Gee vir my asseblief 'n bietjie water om te drink, want ek is dors." Sy maak toe die bokvlesak oop en laat hom daaruit drink; toe maak sy hom weer toe. 20 Hy sê vir haar: "Staan in die ingang van die tent en as dit gebeur dat iemand kom en vir jou vra en sê: "Is daar iemand hier?" dat jy sal sê: "Nee." 21 Ya'el, die vrou van Heber, het egter 'n tentpen en hamer in haar hand gevat en stilletjies na hom toe gegaan en die pen in sy slaap ingeslaan en dit het deurgegaan in die grond in, want hy was vas aan die slaap en uitgeput. So het hy gesterf. 22 Terwyl Barak Sisra agtervolg, let op, het Ya'el uitgekome om hom te ontmoet en vir hom gesê: "Kom en ek sal vir u die man wys wat u soek." Hy het saam met haar ingegaan en let op, Sisra lê daar dood, met die tentpen in sy slaap! (Rigters 4:17 tot 22).*

Hoewel dit wat sy gedoen het as grusaam beskou kan word, het sy nie gehuiwer om haar rol in hierdie bevrydingsproses te vervul nie.

Op daardie dag het Deborah en Barak 'n loflied tot YHVH gesing (Rigters 5:1 tot 31). Hierdie loflied eindig met die woorde:

*Laat al U vyande, יהיה, so omkom! Maar laat die wat Hom liefhet, wees soos die opkoms van die son in Sy krag.” Die land was veertig jaar lank onverstoord.*

## **Vroue in die gemeente**

Paulus skryf in sy eerste brief aan die Korinthiërs die volgende:

*33*want God is nie 'n God van onbeheersdheid nie, maar van vrede, gesondheid, voorspoed en vergenoegdheid. Soos in al die gemeentes van die afgesonderdes *34* moet julle vrouens in die gemeentes stilbly, want dit is hulle nie toegelaat om te praat nie, maar om gehoorsaam te wees, net soos die geskrewe wet sê. *35*As hulle iets wil leer, laat hulle by die huis hulle eie mans vra, want dit is skandelik vir daardie vrou om in die gemeente te praat. *36*Of het die boodskap van God van julle af uitgegaan, of het dit tot julle alleen gekom? 1 Kor. 14:33 tot 36.

Hoe moet hierdie woorde van Paulus verklaar word in die lig van hierdie week se Haftorah? Beteken dit dat vroue in die gemeente – as deel van die liggaam van Yeshua – stil moet bly? Of verwys Paulus se woorde slegs ten tye van 'n gemeente byeenkoms?

Die Griekse woord vir *stilbly* (*swyg*) is *sigāō* en het 'n tweeledige betekenis, naamlik om nie te praat nie (*stilbly*; *swyg*), maar ook om stil te bly om die vrede te bewaar (*hold one's peace*).

Volgens 1 Kor. 11:4 en 5 is dit duidelik dat Paulus nie van mening is dat 'n vrou as deel van die liggaam van Yeshua of tydens 'n gemeente byeenkoms stil moet bly nie.

*4* Elke man wat bid of profeteer met sy kop toegemaak, onteer sy kop *5* en elke vrou wat bid of profeteer met haar kop ontbloot, onteer haar kop, want sy is net soos een wie se kop geskeer is.

'n Vrou mag dus hoorbaar deel wees van die gemeente byeenkomste, maar op grond van twee voorwaardes, naamlik: Eerstens moet haar hoof bedek wees wanneer sy bid of profeteer (1 Kor. 11:5). Verder skryf Paulus:

*want as 'n vrou se kop nie toegemaak is nie, laat sy dan ook haar kop skeer, maar as dit vir 'n vrou lelik is om haar hare te sny of te skeer, laat sy haar kop heeltemal toemaak.* 1 Kor. 11:6.

Hiermee bedoel Paulus dat as 'n vrou nie haar hoof wil toemaak nie, dan kan sy net sowel haar hare afskeer soos die wat geen skaamte het nie – waarskynlik verwysend na die prostitute van daardie tyd?!

Maar dan kan ons ook nie nalaat om Paulus se woorde in 1 Kor. 11:13 tot 16 te noem nie:

*13* Beoordeel onder julleself: is dit reg vir 'n vrou om met onbedekte kop tot God te bid? *14* Of leer die natuur self julle nie dat as 'n man sy hare laat groei, dit vir hom 'n oneer is nie *15* en wanneer 'n vrou haar hare laat groei, dit vir haar 'n eer en lof is omdat haar hare vir haar gegee is as 'n bedekking nie? *16* As iemand hieroor wil stry; nie ons of die gemeentes van God het so 'n gebruik nie.

Let daarop dat verse 14 en 15 is 'n vraag wat Paulus vra met verwysend na wat die natuur ons leer.

Die konteks van 1 Kor. 11:1 tot 16 gaan oor die gedrag van die vrou in die gemeente. Daarom begin Paulus met hierdie woorde:

*Maar ek wil hê dat julle moet weet dat Die Gesalfde Een die hoof is van elke man en die man is die hoof van die vrou en God is die hoof van Die Gesalfde Een. 1 Kor. 11:3.*

Paulus se boodskap is dat die vrou haar onderdanigheid aan haar man en Yeshua deur haar optrede moet openbaar en dat daar te alle tye 'n duidelike onderskeid tussen die twee geslagte en elkeen se rol moet wees. Dit is in die lig hiervan wat Paulus praat oor die vrou wat haar hoof moet bedek wanneer sy bid of profeteer.

Tweedens, en gesien in die konteks van wat Paulus in 1 Kor. 14:26 tot 40 skryf, moet die vrou se bydrae by gemeente byeenkomste ordelik geskied, want God is nie 'n God van onbeheersdheid nie, maar van vrede, gesondheid, voorspoed en vergenoegdheid (1 Kor. 14:33).

Daarom moet die vermaning van Paulus ook gesien word in die lig van Gen. 3:16 waar YHWH vir Eva sê:

*..... "Ek sal jou moeite en jou swangerskap baie vergroot. Met pyn sal jy geboorte gee aan kinders en na jou man sal jou begeerte wees en hy sal oor jou heers."*

Hierdie heers is nie soos die van 'n diktator nie, maar soos Yeshua die hoof van die gemeente is en soos Hy die gemeente liefhet.

*22 Vroue, wees aan julle eie mans gehoorsaam, net soos aan ons Meester, 23 want die man is die hoof van die vrou, net soos Die Gesalfde Een ook Hoof is van die gemeente en Hy is die Redder van die liggaam, 24 maar soos die gemeente aan Die Gesalfde Een gehoorsaam is, op dieselfde manier moet die vroue ook, in alles, aan hul eie mans wees. 25 Mans julle moet julle eie vroue liefhê, net soos Die Gesalfde Een ook die gemeente liefgehad en Homself om haar ontwil oorgegee het. Gal. 5:22 tot 25.*

In die lig hiervan vermaan Paulus die vroue om ook aan hulle mans onderdanig te wees, nie net by die huis nie, maar ook in die gemeente situasie. Dit beteken dat die vrou nie haar man teen moet gaan by die gemeente byeenkomste of betrokke moet raak by gemeente geskille nie. Nee, sy moet eerder die 'vrede bewaarder' wees deur te swyg en dan by die huis haar man te vra.

Ons moet onthou dat Vader-God het 'n gesagstruktuur wat te alle tye eerbiedig moet word. Paulus verwoord dit soos volg:

*1 Word my nabootsers, net soos ek ook Die Gesalfde Een naboots. 2 Ek prys julle, my broers, dat julle my in alles onthou en die opdragte uitvoer soos ek dit aan julle oorgegee het, 3 maar ek wil hê dat julle moet weet dat Die Gesalfde Een die hoof is van elke man en die man is die hoof van die vrou en God is die hoof van Die Gesalfde Een. 1 Kor. 11:1 tot 3.*

Daarom moet ons ook kennis neem van wat Paulus aan Timotheus geskryf het:

*11 Laat 'n vrou in stilte leer in alle gehoorsaamheid, 12 want ek laat die vrou nie toe om lering te gee óf oor die man outoriteit te neem nie, maar sy moet stil wees, 13 want Adam is eerste gevorm, daarna Havah 14 en Adam is nie mislei nie, maar die vrou is mislei en het die opdrag oortree. 1 Tim. 2:11 tot 14.*



Iemand wat lering gee neem outoriteit oor die gehoor, want die leraar (prediker) spreek in die Naam (Karakter en Outoriteit) van YHVH. Daarom: 'n Vrou wat lering gee vir 'n gehoor waar mans ook teenwoordig is, neem outoriteit oor die mans en dit is nie volgens YHVH se gesagstruktuur toelaatbaar nie.

Opsommend: Die gawes van die Afgesonderde Gees is vir almal – mans en vroue. Maar die werking van die gawes by gemeente byeenkomste moet ordelik geskied onder die gesag van die man. Een van die gawes van die Afgesonderde Gees is die van leermeester (leraar). Alle gawes van die Gees mag by gemeente samekomste deur vroue werk (manifisteer), behalwe die gawe van leraar indien mans teenwoordig is.

### **Bepeins of Bespreek.**

1. Is jy geroep om 'n Deborah ('n profetes en aanvoerder) of dalk 'n Jael te wees? Is jy heuningsoet vir familie en vriende, maar die angel in die vlees van die vyand? (Onthou: Heuning word as 'n geneesmiddel beskou!). Miskien is jou rol die van 'n Jael? Die naam *Jael* beteken 'n *wilde bergbok* ('n ibex) – een wat steeds hoër klim om YHVH te ontmoet en Sy opdragte te hoor en uit te voer!
2. Is jy 'n moeder in Israel (Rigters 5:7) – die een wat die geestelike toekoms van die nageslag help vorm?
3. Is jy geroep om soos Debora 'n oorwinningslied 'te komponeer' en voor YHVH se volk te sing (Rigters 5:1 tot 31)? Verwys ook na Mirjam (Eks. 15:20 en 21).  
*The Hebrew word for **song** (zemer) in Ex. 15:20 tot 21 has another meaning as well, namely to prune. The connection is not initially very obvious, but the holy language of Hebrew gets to a thing's very essence. A tree thrives when its heavy branches and extraneous foliage are clipped so that it can focus its nutritional resources. So too we must 'prune' extraneous sounds to be left with a song. We can apply this same principle to transform our lives into holy song by working to "prune" and thus refine our own character traits (Israel365).*
4. Ons leef in 'n tyd waar baie mans hulle rol volgens Torah as eggenoot en vader abdikeer en nie YHVH se Torah soos in Yeshua vervul is, volg nie. Wat verwag YHVH in sulke situasies van die vrou as eggenote en moeder? Mag sy haar man se gesag ondermyn deur te weier om Torah-ongehoorsaam te wees, soos byvoorbeeld weier om die Shabbatsgebod te oortree?
5. Mag 'n vrou optree as leraar by Bybelstudiegroepe waar net vroue teenwoordig is?
6. In Judaïsme en in die Messiaanse beweging sien ons dat mans hulle hoofde toemaak, meestal met 'n gebedskleed, wanneer hulle bid en selfs die woord bedien. Dit is dan strydig met wat Paulus in 1 Kor. 11:7 tot 9!?

-o-o-o-o-o-o-o-

*Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).*

Shabbat Shalom.  
Johan.

Epos: [kontak@nuweliel.info](mailto:kontak@nuweliel.info)

Webwerf: <http://www.nuweliel.info>

*Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.*